



10770

牧齋初學集卷第九十六

外制六

南京吏部右侍郎顧起元授通議大

夫

制曰朕運撫大來助求小忠騷惟舊德式念先猷其有高帝豐芑之遺兩朝侍從之選表儀卿貳體望具瞻者朕方夢卜求之而恩命豈有愛焉具官某才挺天人學知今古射策名成於寡二臨軒象近於魁三蔚有良史之才置之禁近歸然師儒之教貳我成均久列桂坊載臨璧水儲端漸陟爰立有聞迨余訪落之初乃有留銓之命留務清蘭允宜如水之心銓事低昂小試若金之用迴翔滋久雅望在人乃以覃恩授具階於戲非堯舜不譚有體必期于有用以社稷爲說迂身乃所以善君尚念國步之艱危保余冲子母曰留曹之清峻可以優賢爾無忘共濟之思余將有卽真之拜

妻王氏加贈淑人

制曰人臣飛華夷路擢秀清塗必有攸助之賢以當賓友之誼疏榮旣逮愍用宜先具官某妻

國朝吉
書館藏
卷九十六
通議大

封恭人某氏棗修告虔濯漑概奉職本烏衣之著
姓儀法有聞佐青簡之名儒機絲無閒宛其死
矣何以報之翟芾以朝嗟溘先于朝露彤管有
煒美代後于辰猷茲加贈爲淑人蘭儀默贊于
金夫蕙問永光乎石窕

祖雷先贈中憲大夫湖廣襄陽府知
府加贈通議大夫南京吏部右侍郎
制曰國之元氣將鍾美于賢才家有樸心先鬱
蒸爲至德畜無不發報必有初先贈具官某乃
具官某之祖父太樸不雕仁心爲質以孝弟而
兼任恤不言而躬行自保受以及救宥無心於
望報宜而孫子爲吾寶臣達屢繡裳煥然有事
于家廟純衣應杖僂焉如見其祖先是用加贈
具階官爾能積慶于詒孫余用遡源于率祖

祖母劉氏加贈淑人

制曰詩稱詒謀厥孫易言受福王母蓋合中外
百年之鬱積以培國家一代之人才非夫有穀
之詒曷有流根之澤累贈恭人某氏乃具官某
之祖母孝思維則淑慎無儀如生民之厥初時
維草昧肆承家之伊始作其壺彝珩璜被躬茂

矩流傳于奕世機絲比德深仁累積于百年茲
加贈爲淑人服茲烝昇之榮允叶棟隆之吉

父國輔原任湖廣寶慶府知府贈通
議大夫南京吏部右侍郎

制曰朕聞黃河之水源可濫觴泰山之雲起自
膚寸凡創業爲可繼蓋有開而必先原任具官
某乃具官某之父風縉純明器資魁傑以南國
之彥早踐通班以西曹之賢出守名郡惟明克
允仁孚園土之中旣威且懷澤流湖嶺之際敢
澆流之水載廉石以傳家演邵陽之書比籛金
而詒子徵循良之傳于國史父作之子述之啓
公輔之望于邦家我有臣爾有子是用贈具階
官於戲播徽猷於竹帛佇我白麻賁寵命于松
楸慰茲黃壤

母王氏加贈淑人

制曰凡吾聞望之臣必有賢明之母自家所以
刑國本立而後道生風徽有遺式穀不爽封恭
人某氏乃具官某之母敬共內德仔肩壺儀簾
閣相夫佐平反于丹筆篝燈迪子徵掌故于青
箱媿德有聞娠賢競爽炳丹青于經史殷勤碎

呬之規指樞軸於機絲肅穆絃綆之訓茲加贈
爲淑人於戲版輿已遠悵陪京雜涖之游銀管
如新嗣韓國瀧岡之表

南京通政司通政使林學會授正議

大夫

制曰昔我神祖久道作人凡其梓漆之材皆
我儀刑之老踐更禁近布列兩都顧瞻周行蔚
爲盛事朕于恩命豈有愛焉具官某德稟粹和
器涵莊重言行以先民爲法問學稱君子之儒
爰自理官登于銓部清素寡欲進爲郎吏之標

牧齋集卷六

四

淡泊端莊退守丘園之責栖遲一紀羽儀滋章
偃蹇再遷蹈道彌固迨余初服始列清卿夙夜
在公信無慙于舊德衣冠有異恍或疑其古人
惟納言之職官稱爲司命而留務之清峻可以
優賢我有老成往司出納乃以覃恩授具階於
戲惟我新朝其忍退棄先朝之耆老今此舊國
亦得瞻望先民之典刑清廟之求助不遑黃髮
之詢諮敢後尚其彊飯佇我徵車

妻陳氏仍前贈

制曰人臣委質奉公白首一節其于閨門相貳

死生契闊之際人主必閔然念之非徒以卹其私亦以崇報也具官某妻贈淑人某氏靜顯成性柔嫗爲儀酒醴芻羹侍奉必嫻于內則鍼縷刀尺相助尤悉于入官雖不永年厥有令聞中道捐棄終不替黃髮之期早歲勤勤遂永贊素絲之節茲仍贈爲淑人用以昭婦順之報不獨慰夫子之心

繼妻吳氏仍前封

制曰人臣束髮厲行者而彌固則必有賢明之助焉朝廷之有寵章亦所以區明風烈爲世表

牧齋集九十六

五

也具官某繼室某氏儀度閒肅性資惠明宦成不染于紛華家食彌徵其靜好一生麤糲御窮何異于糟糠十載丘園晤對恍疑其賓友終相夫子爲我名卿翟第以朝不改素沙之德縞綦相樂益堅白首之心茲仍封爲淑人尚永垂列女之名且默贊二南之化

祖文明先贈太常寺卿加贈正議大夫南京通政司通政使

制曰國家崇重真儒原本正學瞽宗之祀僅有其人至有經明行修湛思道術鬱積于躬而發

聞于後者又于彝典之中著章表焉贈具官某
乃具官某之祖父古有立德今爲碩儒矩行規
言動應先民之法度窮理盡性學究易道之高
深以人師而爲經師流風邈矣能善世而兼遜
世遺書蔑如迨其子能傳其緒言而厥孫益大
其絕學摩娑青簡神明煥發于百年俛仰丹鉛
晤對恍存于一室天旣厚儒行之報人益徵家
學之傳是用贈具階官於戲文獻有徵箕裘未
艾明德顯于三世固當爲壹行之光遺經著于
再傳用以附儒林之傳

牧齋集卷之六

六

祖母陳氏仍前贈

制曰道德博聞之儒修身遜世而又有賢明之
妃以作之合天將鍾美于是其再世而興也不
亦宜乎贈淑人某氏乃具官某之祖母懿質夙
成德門作配總笄櫛緹侍奉一循于內儀箴圖
珮環被服不異乎儒者盛年不永再世其昌律
呂位同終取和聲之應山澤氣合是徵生物之
祥觀孫子之駿發滋長信天道之挹注匪偶茲
仍贈爲淑人益衍雲仍之祚永言烝畀之休

繼祖母蘇氏仍前贈

制曰家道賤必始于婦人况繼室乎以賢繼賢和氣叶應受茲介福及于再世余有追命其何愛焉贈淑人某氏乃具官某之繼祖母天性鍾慈女圖茂矩依德內助若琴瑟之諧和媿美前修譬珪璋之判合字其子則德叶鳴鳩啓其孫則卜徵鸞鳳邈休徵之濬發于再世信協氣之感聚于一人茲仍贈爲淑人於乎禮垂如母之文永爲徽範詩頌翼孫之美叶彼休徵

父敦忠原任福建興化府儒學教授

先贈太常寺卿加贈正議大夫南京

後齋集九十六

七

通政司通政使

制曰國家方聞篤行之臣巋然羽儀者其淵源家學有聞必先朕固將表而出之非徒崇報而已原任具官贈具官某乃具官某之父言無疵悔行應衡規孝友可質于神明學問必根乎閨維三臨講席歸休乎環堵之宮屢絕常編畢世于訓詁之業肥遯離俗洗心謝末世之風塵厲行東修禔躬爲僞學之箴砭惟而令子爲吾寶臣丹鉛一經篋笥不忘乎家學白首一節風期有繼于前人象賢有徵燕翼未艾是用贈具階

官於乎匪徒命德且以表微生爲人師既有聞
于鼓篋沒祭于社終有位于瞽宗

母柯氏仍前贈

制曰有蹈道之儒則必有媿德之配潛德弗耀
夷于婦孺而卒以其子顯聞豈不休哉累封淑
人某氏乃具官某之母稟性安貞束身祗肅奉
尊章于上食佐夫子于下惟分半席之青氈蕭
然燈火守一宮于環堵永以晤言有此素風成
其賢子羔羊之節咏其素絲多露之防嚴于白
首臣節茂矣母儀徵焉茲仍贈爲淑人於乎生
未播其徽華歿乃留其儀範淑靈不昧尚克享
之

世齋集九十六

南京光祿寺卿管少卿事史弼授中

大夫

制曰朕克克典神天奉先思孝洪惟我 高皇帝

寢園原廟咸在留都歲時薦羞皇敢弗愆慎簡
明德以薦馨香祿臣司光吾有人矣具官某績
密若玉端直如弦自擢西臺以登罔寺奏議多
聞于削藁政績必期于可書進退盤桓不難久
次出入諷議有補本朝晉秩祿卿蔽自朕志往

司留寺非獨優賢蓋爾以廉辨肅括之才而本
諸明允篤誠之德酒醴蒞醢以潔以時上食膳
羞必誠必敬自此寢廟之薦饋致告苾芬行見
高廟之衣冠出游顧享乃以覃恩授具階於
戲朕觀掌故南北光祿職掌不同北以覈乘興
供養爲能南以庀陵廟薦禱爲職爾熟諳故事
必能其官爾其攸右饗于我將余敢忘詒謀于
豐芑爾往欽哉

妻李氏加封淑人

制曰君有公忠之臣夫有貞順之配其勤勞于

牧齋集九十六

九

國與相助于家也人主其有以念之矣具官某
妻累封恭人某氏知讓知戒有肅有慈居恒不
替于專勤躬親春割既貴不忘夫教戒身服頌
圖拜日壘鹽在官何異于家食中宵宿火教子
允勩于相夫遂成女士之名允爲母師之範茲
加封爲淑人展衣白履見命服之有光文駟雕
軒知福祉其未艾

父洪達原任山西平陽府解州儒學

學正先贈中憲大夫太僕寺少卿加

贈中大夫南京光祿寺卿

制曰古者鄉里壹行之士必有崇臺綽擗之褒
朕廣樹風聲旁求懿德以疏榮追命之典寓闡
幽表微之思雖出舊章亦應古法原任具官贈
具官某乃具官某之父介圭不飾璞玉有尤孝
敬溫文少無子弟之過簡默靜退長爲君子之
儒丹鉛獨抱夫遺經青紫不移其素志入學鼓
篋諸生嚴頌禮于登堂彈琴讀書家人狎詠歌
於環堵肆我名卿光於家訓守青氈之故物無
忝所生奉白賁之上爰以永終譽緇衣有託黃
壤如生是用加贈具階官於乎國有彝章蓋以
示先河之報鄉之子弟尚亦勤警宗之思

牧齋集九十六

十

母吳氏加贈淑人

制曰古之賢達必有母師故公忠廉直之臣必
不產於冶容逸樂之母家人婦子之閒風氣積
習而家教從之可不慎與累贈恭人某氏乃具
官某之母克全四行慎守七章賤綺縠之蠹女
紅躬紡績以移日惡華丹之亂竊窈窕服綦縞以
終身儉爲德共不替寢門之教繪居素後嘗餘
裙布之風惟此令人守其善訓寡言正色奉陝
翰輕脫之規夙夜在公稟貞靜清閑之德茲加

贈爲淑人於乎漢曹昭之誠子恐辱清朝魯敬
姜之教家恒憂下位風徽可繼圖頌具存尚無
忘典訓之儀庶益茂珩璜之矩

祖鍾華贈中大夫南京光祿寺卿

制曰朕聞人才之生必有根本源流弘長教義
有傳是以卿士之風猷咸稱祖考之誥穀本諸
家史著之冊書史某乃具官某之祖父淵如有
容粹然特達赴公家之難能急病而讓夷卹昆
弟之貧每絕甘而分少躬爲長者之行飲人以
和晚多達生之言佚我以老身既隱矣爲善何
意于近名德莫大焉節身乃用以昌後餘其善
慶詒爾孫謀試觀世德之蟬連益見祖風之綿
邈是用贈具階官於乎美其所稱論譔何慙于
銘鼎沒而不朽典祀將著于馨宗

祖母蔣氏贈淑人

制曰敬姜不云乎君子能勞後世有繼古之女
宗所以詒謀而垂戒者如此其至也能勞之報
百世未艾而况于再世乎某氏乃具官某之祖
母歲圖被躬棗修循禮辛勤十指潔酒食以供
祭賓龜勉一生勤辟績以先媪御子姓憚其嚴

恪家人化其專勤是以保姆之規終老而不懈
先姑之戒易世而彌敦宜爾聞孫受茲介福茲
特贈爲淑人嗚呼惟茲恩命著爾壹儀不惟爲
女史之光尚有助寢門之教

南京光祿寺少卿馮若愚授奉政大

夫

制曰我皇祖久道化成人物蔚起凡今中外
具瞻之彥卒多萬曆培養之人至於淹抑回翔
盤桓久次老其梓漆之材留爲子孫之用於今
爲盛朕有賴焉具官馮若愚王潤而栗絃直以

牧齋集九六

十二

端西曹執法於平反南國流聲於出守屬稅貂
剥膚之日措彼呷牙值俵虎擇肉之時枉其血
吻縛廝徒於襄水填塞濁流投養子于漢池蠲
除宿垢是以中人肆其謠詠馴致聖主亦爲
嘆咨治郡九年薦章數上堂堂題柱姓名久署
於屏風累累積薪陞轉終淹於啓事歸田園者
十載教子姓以六經蒿目憂時有似羊公之流
涕閒居念舊宛如杜預之沈碑惟衰榮之有嘗
見風雨之不改聿求舊德爰陟留卿勾稽原廟
之膳羞綜覈寢園之饋享衣冠有異想風烈於

先朝俎豆惟新凜冰霜於夙夜乃以覃恩授具階書不云乎人惟求舊惡之在今日猶大廈之有巨木而清廟之有雅音也重之以祖考之詒固將儲侍於維下優之以留務之簡豈云留滯於周南爾勿謂白首而見招余將惟黃髮之是詢爾往欽哉

妻顧氏贈宜人

制曰國有元妃卿有內子艱難相助恒嗟咨草昧之初契濶死生每憶歎芳塵之後我求懿德著之策書具官某妻累封恭人某氏體順爲心

牧齋集九十六

十三

蹈和成性辛勤相讀膏火夜宿於寒窻黽勉佐廉突煙朝冷於官舍順能鍾物和以致祥謝氏之芝蘭羅生堂祀王家之龍虎競奮尸庭雖大命之不遐而徽猷之如不頌高秀之行以爲國爵屏貴家爵忘貪求子友之風則曰衣無嘗主兒無嘗父顧此家風之綿逸皆懿儀法之深長矧新恩錫類之辰正舊德升華之日茲加贈爲宜人於乎拜像而泣知珥貂之有人可頌而圖洵管彤之不朽

繼妻姚氏贈宜人

制曰朕追慕原陵永懷長樂訪問掖廷椒房之
故事感嘆曾參王駿之墜言當霈恩之時於吾
臣下室家新故之際未嘗不悽愴眷顧而重以
書命也具官某繼妻某氏禮必叶中言無出聞
鵲巢比德相夫益勉於晨昏鳩養一心鬻子無
間于毛裏於茲漏澤念彼窮泉固云誼重於遺
簪亦曰愛深於織屨螟蛉有子閨門聿著其恩
勤麟鳳多才邦家猶藉其長養茲特贈爲宜人
於乎繼賢明之範百年均湛露之恩廣慈孝之
風千古釋履霜之痛

牧齋集九十六

十四

父季兆原任工部司務贈中憲大夫
湖廣襄陽府知府加贈奉政大夫南
京光祿寺少卿

制曰祭必有先禮當數祖考世家之閱閱表不
如揚徵世德之淵源卿猶慙長名教必繇於積
習而光輝亦漸以發聞原任具官贈具官某乃
具官某之父學擅菁華行兼圭璧橫經講學則
雲集生徒筮仕僑工則霜清郎署休有譽夙愴
無伎求歸休乎一畝之宮自命以千秋之業篝
燈簾閣息游有似乎飲也分少絕甘推解不忘

乎舉火奉九言於太叔守以終身放三省於子
輿歿而得正居然白賁以廉讓爲箕裘蔚矣丹
鉛用詩書爲簪笏是用贈具階官於乎家有譜
牒發祥必邇于濫觴國有彝章揭德可符於汗
簡

母錢氏加贈宜人

制曰蓼蕭之澤自業以及根望祀之誠先河而
後海故家頌賢明之母則國稱志義之臣不有
追崇何言報稱累封太恭人某氏乃具官某之
母發揮婦道標表母儀宜爾室宜爾家儀範茂

後齋集卷六

十五

傳於九族相其夫相其子光華蔚起于一門迨
乎卿月之流暉已見婺星之掩彩雕軒文駟追
銅鞮就養之時風樹寒泉遡石窳開封之後罷
社之痛有節累茵之悲何窮爲歌念母之詩彌
深陟屺之歎茲加贈爲宜人於乎慶鍾燕翼象
已感於台階祥發羽儀光先賁於堂斧余將有
事於申命爾其無憾於下泉

南京浙江道監察御史曹汝蘭授文

林郎

制曰國家妙選臺諫南北竝置豐鎬重地賴執

憲之臣以彈治之其風采論議猶在吾轂下也
推恩之典其可後乎具官某風簡詳密藻思清
華奮跡賢科爲政疲邑撫江陽交會之地字巴
渝凋瘵之民洊陟留臺彌深宿望上章保護拳
拳禁闈之思荷橐巡行凜凜陪京之寄朕嘉乃
志樂觀厥成茲以覃恩授具階於乎奉高帝
之衣冠則當厯對揚之慮覽江山之形勝則當
思鎖鑰之艱凡吾所望于爾者固不徒飛章傳
遽稱諫臣之選而已也爾其懋哉勿替朕命

妻丁氏仍前封

牧齋集九十六

十六

勅曰人臣出宰遐邦入司雄職固國之勞人也
不有賢婦以相其內欲壹心營職不已難乎具
官某妻封孺人某氏動爲柔範言著禮經攻苦
力相夫下帷御窮不變于臚仕夜行多畏用知
交儆之心辰告有章數厯如何之問茲仍封爲
孺人服茲翟茀之章益茂管彤之德

父馳周贈文林郎四川重慶府江津

縣知縣加贈南京浙江道監察御史

仍前階

勅曰人之餘休如木之垂陰爲吾志義之臣蔚

起休問亦其先之德陰有以詒之也贈具官某
乃具官某之父少有大志長實素心誦德誦聲
自喜爲節俠之行依忠依孝安得此長者之言
種德不見其逢年市義乃徵于易世宜而哲胤
作我寶臣是用贈具階官於戲有子克家聿著
堂皇之美厥考作室尚思塗墍之勤

母李氏仍前贈

勅曰食而能教式穀所以成名養不逮親栝椿
由之永慕贈孺人李氏乃具官某之母淵懿可
度柔嘉有章事夫薦疾之餘訓子童蒙之日蘭
儀奄沒蕙問彌新簪筆生風尚想指陳于畫菽
憂心如醉徒懷手澤於丸熊茲仍贈爲孺人哀
此風木之悲用霈蓼蕭之澤

南京江西道監察御史陳必謙授文

林郎

勅曰御史執憲轂下紀綱國體其在留臺耳目
之寄稍遠而彈肅之任彌專自非風力肅明夙
爲民譽何以中吾茲選乎具官陳必謙行修而
志堅器弘而識定廉辨勵節有毀家紓國之思
勞勩服官以勤恤民隱爲事踐更劇縣擢寘留

臺誠結于中義形于色人中屈軼京國爲之聳
觀柱後惠文奸回于焉屏跡不俟陽城七年之
久已占魏徵百奏之陳古稱真諫臣吾有望焉
乃以覃恩授具階於乎我 高帝寢園原廟咸
在舊都豐水鎬京厥有遺烈爾思忠思孝儼若
顧瞻之紀之綱訪求故實斯所以稱職者大而
裨余者弘矣爾往欽哉

妻錢氏仍前封

勅曰爲吾臺憲之臣正色斂容而風裁茂著非
獨其束修自好也家人婦子之間亦必能相戒
以有成矣朕深嘆之具官某妻封孺人某氏孝
敬有齊儉勤無斁鳴環司饋匡卒業于三餘服
縞從官贊素風于五緘用能使凜然風裁恒警
戒于畏行矯矯霜稜不摧殘于交謫瞻此乘驄
之節居然弋鴈之規茲仍封爲孺人再承珈副
之榮益懋珩璜之範

父希堯先贈文林郎河南衛輝府輝

縣知縣加贈南京江西道御史仍前

階

勅曰士之精神才術不獲試于身則必有以顯

聞于後土之膏也必發川之壅也必決挹彼注
兹天道使然也贈具官某乃具官某之父器資
魁壘性行深淳孝友于家退而修長者之行節
俠自喜進不干鄉曲之名聚散千金生產不介
乎目睫俛仰一室世務恒列乎鬚眉宜爾後人
繼其大志高吾門今容駟馬已叶再世之占度
其旁可置萬家庶慰九京之願是用贈具階官
於戲可垂可繼是誠在于人謀爾熾爾昌尚亦
觀乎天咫

母張氏仍前封

牧齋集九十六

十九

勅曰傳不云乎培塿無松栢朕之諫臣有居正
秉義風彩著聞者所謂非積習名教不至此者
也娠賢育德母師之功其可誣哉封太孺人某
氏乃具官某之母德備孝慈性成淑慎練裙椎
布偕隱德于逸人苦膽寒灰佐義方而教子是
成廉吏作我臺臣素節高寒有華丹不御之志
東修刻勵有機絲警戒之風儀範滋章徽華茂
著兹仍封爲太孺人黃髮鯢齒知福履之永綏
文駟雕軒洵往來之有煒

河南衛輝府輝縣知縣陳必謙前母

錢氏贈孺人

蘇

勅曰朕發號霈恩爲吾臣子輟蘭陔之思釋柩
捲之痛者可謂至矣其有生不獲事沒不獲封
情有所窮禮無可考而亦得以與被焉者於乎
此亦仁之至義之盡矣某氏乃具官某之前母
出於忠孝之門躬有共儉之德殫十指以起家
瘁一身而作苦經營草昧奄忽盛年墓木已拱
陳根不哭豈意四十餘年之久責爾幽窆者乃
在所不知之人乎又豈意夫情無節而禮有制
考課不能得而覃恩得之乎於乎崇報有初蓋
取先河之義發祥有自必問濫觴之源因母以
念母嗟長樂之鼓鐘同悲靜夜因親以及親使
海隅之枯木咸被春風茲特贈爲孺人薨兮享
之可以爲慰

牧齋集九十六

二十

南京四川道監察御史萬言揚授文

林郎

勅曰朕讀前史至皇祐宣諭御史必用忠厚純
直通世務明治體之人未嘗不三復斯言也閒
者遴選臺諫錯置南北妙簡循良皆用此意具
官某才華恢傑器識深沉拔穎賢書分符溯水

乃膺師薦擢寘留臺材猷滋深節槩日老昌言
抗疏期于木直而從繩奮志觸邪俄已陰消而
見覘南國仰巡行之跡舊京傳且止之謠乃以
覃恩授具階於戲以中朝選建之憲臣居留臺
風紀之要地肅離摺笏可以對越高廟之神
靈慷慨乘驄可以坐制長江之要害朕固將居
近而御遠爾勿謂重北而輕南佇爾飛章啓余
逖聽爾往欽哉

牧齋初學集卷第九十六

牧齋集卷九十六

二十一

風靡之憂此肅聽番參下以樞機 高廟之神
草恩殊其制然燈以中賻戮戮之憲拜景留臺
具與南國仰巡行之跡舊京傳且止之謠乃以
詩起賤于本直而從繩奮志觸邪俄已陰消而
臣膺師薦擢寘留臺材猷滋深節槩日老昌言

牧齋初學集卷第九十七

外制七

南京吏部驗封清吏司主事譚性教
授承德郎

勅曰留都諸子部有官要而務閒者其吏部司
封郎之謂乎要故人不亂於品流閒故議不殽
於藩棘非風猷特達不在茲選具官某早登俊
造兩最循良棠陰遍陳汝之閒尸祝在黃韓之
後屢聞師薦簡畀留銓練達甄材清通擅譽飲
冰之操已著於當時如水之心可徵於受事乃
以覃恩授具階朕閱南司封掌故歲移文省直
督促捕蝗以問民爲弊吏獨與諸曹異爾在相
城蝗不爲害所司會上其狀今何以修舉其職
乎無徒謂留務多閒也朕又以此弊汝

南京戶部江西清吏司主事李士高

授承德郎

勅曰頃者饋餉滋煩度支告匱司計之臣日夜
左支右吾而留都王業根本也以歲計之不登
儲蓄之不豫朕蓋憫然念之具官某入承軒對
出佐邦刑桁楊盡服其平反棠蔭交加於齊楚

乃留曹司計之日正軍儲告急之時蒿目以憂
剋心而計嚴勾稽而宿弊必清精黍餽而瑣科
不計二載于斯廉能茂著乃以覃恩授具階爾
嘗視庾浦口矣新墉屹然襟帶江左其中儲侍
足支幾年乎非強兵無以備豫非廣蓄無以養
兵此根本綢繆之至計知爾之有槩於中矣尚
深籌利便佐我邦計欽哉

妻孫氏加封安人

勅曰女之司閭猶官之司庾也秬黍餽合之間
有節度存焉謹而司之服官之道可以喻於家

牧齋集卷七

二

具官某妻封孺人某氏蚤嫻女箴長共婦則夜
從辟績燎火省費於三時朝庀米鹽菽水辛勤
於十指爾夫司刑佐計斤斤尺幅爾有助焉茲
加封爲安人無忘丙夜之勞以對清朝之祐

父嘉輔先贈文林郎湖廣岳州府推
官加贈承德郎南京戶部江西清吏

司主事

勅曰孝弟力田之士多食報於後人蓋其風氣
篤固厚取德而薄取名固天之所私也贈具官
某乃具官某之父天之君子鄉之善人掩齒孟

春時發梧丘之夢爲食儉歲不嗟蒙袂之人月
旦襲美於鄉評閭閻貽休於後嗣是用贈具階
官尚知積善之有餘不以近名而多獲

母孔氏加封安人

勅曰古稱賢母聽齋閣問七著以成其子閭里
孤生安所取此無亦慈庭也教有深於辟呷者
手贈孺人某氏乃其官某之母裙布被躬機絲
作教淑善夙嫻於內訓樸心獨喻於後人麟趾
之仁掩藹柔嘉之則羔羊爲節依希靜好之風
茲加贈爲安人爾所謂以身教者乎爾子砥節
首公曰以身報爾矣

牧齋集九十七

三

南京戶部廣東清吏司主事馬士英
授承德郎

勅曰度支之官南北竝置以陪京之重舉天下
歲輸有嘗額而戶曹諸子部分而理之非公忠
廉直深於國計者不在茲選具官某蔚爲民譽
奮起賢科端居懷康濟之憂射策見縱橫之略
乃登留署屬在地官飲水自矢握算濟時有幹
理之才而控括不及於瑣科有經遠之略而勾
稽必謹於出納試用以來於儲侍良有補焉茲

以覃恩授具階於戲南自京江北至畿輔歲輦輸飛輓以實舊都而爾所司筦雄郡四焉撫職方之遠念貢賦之艱其亦有閔然動心者乎古稱貯積天下之命儻合升斗其可以屑越視之乎爾能於其官治一司而度支之計畢舉母謂錢穀吏纖嗇也朕將顯陟汝

南京戶部河南清吏司主事王建侯授承德郎

勅曰乃者度支告誦國用不充朕有憂之以謂廣求持籌握算之臣不若風勵砥節首公之士

牧齋集九十七

四

節省出內帑計耗登而國計得以疏剔焉此朕之志也具官某爰自英妙射策甲科粹然特達之姿銳如新脫於穎服官民部試政權關以約已裕民之心行通商惠工之政節縮至秋毫而止不以病民誰何無夏日之威有如過客稅額首上烝徒謳吟乃以覃恩授具階夫司關之官非徒算舟舩嚴簡覆而已維揚介在江淮商旅駢闐奸利雜出寬以惠之廉以威之於均輸稅賦之中寓譏察非嘗之意此司關者之所有事而持籌握算之臣未必知也朕不徒以錢穀吏

目爾爾其念哉

父允中原任甘肅總兵都督同知進階光祿大夫

制曰昔云山東出相山西出將又云絳灌無文隨陸無武今吾虎臣乃生國士握文經武萃於一門誕告治朝用頒新命原任具官某乃具官某之父稟三晉之閒氣作萬里之長城風雲暗曉曾藏三略之書營壘宿成手布八方之陣一飯必同賤卒能均養士之羊片言每聽輿人嘗倚識塗之馬起家天水仗鉞酒泉分閫外者近

牧齋集九十七

五

三十年積首功者餘二千級授杜預之經傳粲若兵符惇郤縠之詩書蔚爲義府震一索爲長子師三錫於丈人乃以覃恩進階爲光祿大夫錫之誥命嗚呼套虜甲飛佟酋狂逞惟疆圉之多故厯鞶鼓之興思彎弓射鵬匈奴久憚夫李廣被甲上馬中原尚憶乎廉頗爾無引誰可之嫌余將嗣卽圖之頌

南京戶部浙江清吏司主事郭澆授

承德郎

勅曰留曹諸子部多坐嘯畫諾爲事而民部掌

司倉庾會計細碎君子蓋盡心焉以國計之重而東南根本之所關不可以忽也具官某夙承家學蔚起賢科掌英蕩之節而登車有光竭咨諏之忠而皇華重拜隨牒平進擢任戶曹參計耗登贊舉籌策握算不遺乎勾股覈稽每剔夫耗蠹受事未久聿有成勞茲以覃恩授具階留都水陸輻輳歲輸有賞然歲比不登江防多警豐鎬興王之地孽牙其間夫留都天下之本而積貯天下之命也爾以卑錢穀之吏安諱富彊之名悉意救時朕且以觀爾所學焉爾其懋哉

牧齋集九十七

六

南京戶部湖廣清吏司署郎中事主

事曾舜漁授承德郎

勅曰朕觀豐水有芑著於周詩凡致奕世之太平必賴先朝之遺彥不惟簡在具瞻之位抑當求諸郎吏之中具官某才擅清華器本特達策雋科於異等騰夷路以升華在蓬池道山之閒編摩有日當荷橐籥筆之任裨益弘多見斥一鳴回翔三仕睠惟舊德在我留曹不鄙其官劇心錢穀之務靖共爾位安身錯厲之餘仰屋而嗟笑書空於終日如墻而進悼營競之成風閱

歷有聞體望滋茂乃以覃恩授其階於戲惟
皇祖作人之久當朕躬求舊之時借留務以優
賢固已盤桓而久次簡郎潛之宿望自當連茹
以偕升服我訓辭益敦素履欽哉

南京禮部儀制清吏司主事袁中道
授承德郎

勅曰南都諸子部皆優游奉職而儀曹尤爲清
峻以士之有道而文者回翔其閒斯亦國家之
羽儀也與具官某少負修能長爲民譽江漢之
閒炳然有聲及其飛華夷路栖遲寒氈投閒置

牧齋集九十七

七

散頡頏歲年可謂有道矣儀曹之簡聿在舊京
以爾諳於故實可以居禮樂之司淡然無求足
以當清廟之器譬如眉目之在面而人無不識
又如珠玉之在握而動必有聲用爲羽儀誠無
愧焉乃以覃恩授其階朕方欲覽兩朝之舊
章考二京之故事爾有楚史之才爲小儀之選
勉事筆札以待訪求母姑以登高能賦爲事則
余汝嘉

妻羅氏封安人

勅曰婦人之德不出於閭如玉在璞不可得見

惟躬有令德作配君子而後以其夫有聞焉具
官某妻某氏出自冠族備有儀法事實祭則酒
食祇飭御妾媵則寢門肅然可謂有婦道矣德
不外見以夫而顯人曰君子之妻宜有女宗之
號顧不休歟茲特封爲安人爾故以夫有聞也
尚益敬順夫子以永終譽

南京禮部祠祭清吏司署郎中事主

事鍾惺授承德郎

勅曰朕南望鍾山高帝衣冠在焉歲時掌故

祠部郎實有司存它壇廟弗論也南祠曹所領

牧齋集九十七

八

仰承宗廟豈不重哉具官某文心蔚秀志節茂
明肅然禮容清廟之器蓋嘗首遴使職擢以清
華而卒自請留曹避夫熏灼遭逢改革諳曉舊
章遂使舊都原廟之儀儼如更衣顧成之近朝
夕有恪本其氣志之清嚴典要周詳乃以回翔
之淹久茲以覃恩授具階日者祧祭紛紜廟諱
錯互議者頗煩聚訟而祠部職守闕然何以稱
吾清選乎爾領祠曹官南部以典祠之官居職
司之外博觀掌故必有建明是亦高皇帝所
昭格也爾無以出位爲戒余則汝嘉

妻黃氏封安人

勅曰陰幽坤柔婦德之恆也樛木之詩咏婦順之逮下而曰福履將之天且將之而况於人乎具官某妻某氏媿德芳華齋躬布素有旨畜御窮之心有琴瑟靜好之思可謂有順道矣朕觀於二南美螽斯不妬之德蓋深有望於爾茲特封爲安人夫士與女一也士不恃求女不嫉妬皆順逮之道而天之所將也爾夫子之怡然久矣爾必勉之朕將以風百爾君子

父一理先贈修職郎行人司行人加

牧齋集九十七

九

贈承德郎南京兵部職方清吏司署

郎中事主事

勅曰夫人撫非所生之子若螺贏之祝肖我也若夫孝友之極精氣專壹又豈待祝而肖乎贈具官某乃具官某之父藹藹吉人斤斤壹行用勞養志無間孝慈并食更衣恣其友愛蕭然五畝之宮蔚有太和之氣以弟之子爲子而逾於己子不亦宜乎是用贈具階官用昭式穀之風以爲友于之勸

母陳氏贈安人

勅曰家道睽必始於婦人易象睽也繫於家人之後朕讀而三歎焉某氏乃具官某之母齊其躬心動有儀度肅共之德著於尊章柔嘉之則行於妯娌家庭有共被之歡子姓無析居之事至於鬻子之閔篤摯裏毛而式穀之勤躬親辟呬身食其報又何疑矣茲特贈爲安人於戲睽者家道之窮也順者地道之終也觀於家可以覩國朕之章爾也豈獨以爲女憲乎

本生父一貫原任常州府武進縣儒

學訓導封承德郎南京禮部祠祭清

牧齋集九十七

十

吏司主事

勅曰今明經之士蹈道深遠者有矣有之而不以上聞有司之過也朕乃以其子知之具官某乃具官某之本生父強學待問博喻爲師淡漠清真白首一節讀書窮老丹鉛之跡宛然有子起家白賁之風如故古所謂經明行修爾無愧焉是用封具階官爾雖以爾子有聞矣然握蘭建禮之署亦何以異於環堵之宮乎爾尚祇服乃官爲明經士建的焉朕汝嘉哉

本生母馮氏贈安人

勅曰詩不云乎夙興夜寐無忝爾所生人子之
重所生久矣朕蓋愴然悲之某氏乃具官某之
本生母性資惠明儀度閒肅佩敬姜先姑之戒
循大家嫂妹之規娠賢有成喜移根之滋茂風
徽尚在乃自葉以推恩茲特贈爲安人於戲朕
方愴長樂之慈顧兩宮之養爲吾臣子蓼蕭之
澤未逮而風樹之歎不輟豈吾所以念母勤之
意乎吾之疇爾不薄矣尚默相爾子思所以稱
南京兵部職方清吏司主事方應祥

授承德郎

牧齋集九十七

十一

勅曰朕聞天下有道人材鬱然凡在庶官郎吏
之中率有大人長德之望頃者摧剝之風長而
扶養之道微梓漆之遺僅有存者朕未嘗不愴
焉念之具官某行茂枝葉文融菁華臯比執經
奄有河汾之席束修自好居然會史之風孝已
移於事君情尤諗於將母顧此留曹之彥實吾
豐芑之英羽儀有聞體望滋茂乃以覃恩授具
階於戲以先朝禮樂之儒居留樞鎖鑰之地惇
詩說禮可以肅環衛之軍容闇記坐譚可以制
江流之要害夫在泮獻馘固儒者之能而俎豆

折衝非異人之任也爾其勉哉朕之儀爾久矣
妻鄭氏贈安人

勅曰士君子風義篤厚其於故衣棄履猶閔閔
矜卹焉而况伉儷之間死生之故乎具官某妻
某氏稟德含貞服勞攻苦糟糠不厭能節腹以
奉姑躡踊無時遂委身而殉母命矣不淑傷如
之何其左友朋始絕陳根之哭矧於夫婦能忘
短檠之悲茲特贈爲安人於戲以我彝章勸茲
恩義不徒息谷風之刺庶幾歌伐木之詩

繼妻王氏封安人

牧齋集九十七

十二

勅曰高明博大之士不役志於家人瓌屑必有
儉共之婦夙夜相貳以崇厥德具官某繼妻某
氏出自辨族歸於鉅儒當其鼓篋經年樞衣滿
坐宵衣臥起盡心力以奉姑宿火辛勤親割春
而飯客使爾夫心安子舍而慮絕寢門斯可以
爲難矣茲特封爲安人於乎徧謫徧摧無復北
門之歎采蘋采藻庶幾南國之風

父文炳贈承德郎南京兵部職方清

吏司主事

勅曰朕聞遷固爲繼述之書歆向有異同之論

父子之閒紹聞講德皆有以衣被後人映絕百
世方某乃具官某之父家世一經稼獵數卷文
章不叶於時好風氣獨近於古人詒彼象賢光
於奕世發揮宿學大著殺青之書研味緒言未
殫絕韋之業虎賁如在鶴和方新是用贈具階
官於戲名山之闕惜罕遇其人闕閱之高華或
隳於後惟此世家之學是爲不朽之光予言不
誣爾澤未艾

母鄭氏封太安人

勅曰南陔之詩不作而孝友缺也朕憫然憂之

牧齋集九十七

十三

其有是而恩不下逮豈吾所以孝理天下之志
與某氏乃具官某之母天與柔嘉人推貞淑稟
列誓夫辛勤教子追辟咍之遺訓則曰先君之
思陳圖史之芳規兼以古人爲法克成賢子蔚
爲大儒循彼南陔相戒以潔白爲養來歸自鎬
飲御皆孝友之朋此亦當世之榮觀而新朝之
盛事也朕甚嘉焉茲特封爲太安人於戲小雅
之作可覲於今大國之封肇開於後爾其彊飯
服我寵光

南京刑部浙江清吏司主事董繼周

授承德郎

勅曰朕聞留務多閒諸曹郎類優游養望而刑
曹尤甚雖然亦有踔厲首公之臣盤桓於久次
者乎朕蓋嘗盱衡念之具官某藏器濟時矢心
憂國當其出宰海邦禽獮黎寇誓師於譚笑之
中饋運於風濤之內暴露已良苦矣迨留曹病
起之時正東虜逋誅之日爾乃思舍嘉石而趨
戰場釋爰書而譚兵法慷慨上書輒求自試事
雖未行可謂有其志焉茲以覃恩授具階於戲
一隅不賓王師在野四郊多壘所謂卿大夫之
辱而蠻夷猾夏抑亦作士者之責也爾母以祥
刑爲苛細母以卽戎爲經奇節其壯事而恣其
老謀朕且有後命焉欽哉

妻王氏贈安人

勅曰爲吾志義之臣感槩立節其作之配者非
有卓行何以稱嘉耦哉具官某妻贈孺人某氏
儀法有傳訾笑不苟事姑盡瘁而卒以從姑於
九原於姑爲死孝於夫爲媿德矣茲加贈爲安
人於戲崇臺綽楔之制雖未備也其亦可以有

聞矣夫

繼妻程氏加封安人

勅曰傳稱婦學於舅姑故不及舅姑爲不幸雖然賢明貞順之婦亦安往而不學哉具官某繼室封孺人某氏惠明爲資環珮中禮鴻鴈壹德則學於母氏雞鳴儆戒則學於夫子卒相其夫以有立也雖不及舅姑其不謂之不幸矣乎茲加封爲安人爾服我休命再矣其益曙戒勿怠父應宸先贈文林郎廣東惠州府海豐縣知縣加贈承德郎南京刑部浙江清吏司主事

牧齋集九十

十五

勅曰傳曰求忠臣必於孝子之門夫子之能仕而父教之忠也不若其躬以孝教也朕有嘉焉贈具官某乃具官某之父少有至性長猶樸心戀祖於羈貫之年殉父於顛毛之日捐其身以盡孝而詒其子以作忠今爾有子矣是用加贈具階官爾子之報稱伊始教忠之效豈可量哉

母顧氏加贈安人

勅曰今之臣子亦有廢蓼莪之詩而抱楛棣之痛者乎是與吾同悲者也朕深念之贈孺人某氏乃具官某之母稟溫恭之德函淑令之儀攻

苦於結縵之年矢志於截髮之後三遷之教旣成而一日之養不逮不已悲乎茲加贈爲安人於戲朕爲爾子疇爾爾子之念母勤也其亦思有以稱乎爾子慷慨上書固曰可以身許人也予旣已知之矣

南京工部營繕清吏司郎中姚之光
授奉政大夫

制曰朕承先帝之不業應門法殿次第修舉瞻睇陪京高帝之豐鎬在焉今其舊宮原廟日就彫廢而朕忍獨高明爽塏以臨諸侯冬官之

牧齋集九

十六

屬列在留曹則有司存當識朕意具官某蜚聲藝苑奮跡賢書出牧金城入叅留署以博通之學兼膚敏之才漢宮之萬戶千門悉能闇記周禮之經涂九軌咸可指陳鳩僇之務惟勤樽節之功斯著乃以覃恩授具階於戲我高帝卜建舊京城闕省署盡出指授開國承家其規模具在也覽考工之法率將作之職因時與材著吾不忘塗墍之意是誠在爾爾勉之哉朕之業在文王有聲之卒章矣

南京工部都水清吏司主事潘守正

授承德郎

勅曰昔人久居郎署至勤人主爲之勞問非獨
仕宦淹久可爲歎息亦以士之服官材老而奇
望久而宿不可以新進趨風之士輩流畜之也
具官某姿本淵醇政成愷悌郡邑跋扈中外量
移迨南曹留滯之時在左宦踐更之後却騏驥
而不御世之所嗟騁修途而不前爾亦何罪往
視蘆政在彼江干巡行轄吳楚之衝節縮省東
南之力洲人渚戶樂輸芟葦之供絕塞竝邊印
給輓飛之利歲閱既上賢勞汝嘉乃以覃恩授
具階於戲人惟求舊余不以隨牒而滯平進之
人靡不有初爾無以淹恤而忘鞭後之慮勉副
雅望服此訓辭

牧齋初學集卷第九十八

外制八

河南按察司按察使盧維屏授通議大夫

制曰國家設按察之官謂之外臺所以廉察所部而提振綱領也及其弊也視日月以叙進而彫敝滋多急亭傳以觀政而奔趨求譽有司益用不職民生無所告愬夫法不擇官官必奉法而況于以法爲官者乎此予之憂也具官某起自循吏擢爲清郎皆有賢聲溢于官次叅藩睢

牧齋集九十八

陳蒐兵獮盜三年有成乃晉憲職爾自筮仕以還皆用隨牒平進可謂不汲汲矣今茲頒布詔條澄清郡邑春生秋殺壹以案肅凋敝爲事朕甚嘉焉若爾者斯可謂之執法之官矣茲以覃恩授具階爾所部包舉河雒周先正之所保釐也畢命曰商俗靡靡利口惟賢今監司項背相望靡靡之餘風自上下焉爾其益肅明風績予將祇命爾以畢公之事爾其念哉

妻潘氏加封淑人

制曰詩稱婦道曰無非無儀婦人之非與儀不

可得而見也觀于其夫則知之矣具官某妻封孺人某氏靜好有閑柔嘉維則膏火著勤于茅屋碎績不聞于官舍爾之夫有羔羊之直勵秋鷹之威而爾之內德亦茂著焉茲加封爲淑人女德不外見以爾爲師則亦何患乎無聞也哉

祖現贈中大夫河南按察司按察使

制曰詩稱陶唐氏之民思深憂遠儉而用禮今其遺教猶有存者盧某乃具官某之祖父孝悌力田仁心爲質當其稅衣南畝攻苦食淡斯固晉民儉陋之風至于發粟焚券慨然市義則深思之君子或未逮焉惟此良士詒厥孫謀職思其居脩我臬事斯爾之遺教也是用贈具階官於戲爾服茲休命所以相爾孫于冥冥者豈有窮哉

祖母張氏贈淑人

制曰咏唐風者又取葛生蓋以其女子潔明專壹有思深用禮之風不獨其君子然也某氏乃具官某之祖母裙布操作壺漿盥耕相其夫以力田勸其夫以種德於乎其斯以爲唐風之女予乎茲特贈爲淑人葛生之蒙蔓也椒聊之蕃

衍盈升也詩可以觀豈獨一家之盛而已

父文科先封文林郎直隸寧國府宣
城縣知縣加贈通議大夫河南按察

司按察使

制曰爲吾執憲之臣風績茂著者必褒顯其先
人非徒昭吾需恩也亦用以著教焉封具官某
乃具官某之父介圭有邱朱絃比端訓爾子者
皆古人之話言遺于後者有先民之風骨詩不
云乎式穀似之爾子崇憲陳臬厥德不回可謂
似矣予其可以無褒乎是用贈具階官膺此追
命沒而不朽爾之遺教不滋大與

後齋集九十八

三

母王氏加封淑人

制曰子之能仕父教之忠蓋亦有母教焉古之
所以宗母師也封孺人某氏乃具官某之母鍾
天性之深慈躬女圖之茂矩善事尊章所以教
忠不先妯娌所以教讓以餐飯之加否教仁以
衣裳之數澣教儉爾子之能其官也惟爾之勤
茲加封爲太淑人夫古之賢母克成其子者多
矣及其子之榮而身親見之者少也朕發號推
恩不靳寵命亦欲使天下爲母者聞庶幾乎知

聖善之報集于厥躬不徒圖畫管彤之足慕而已也可不念乎

浙江布政使司右叅政李叔元授中

大夫

制曰朕追懷先正不薄外僚碩輔名卿往往輩出非獨均勞出入國有嘗經亦以才閱則堅知練則老馭歷滋久體望亦茂著焉士多競進此風日微吾見其人不_不忘嘉嘆具官某珪璋特達琴瑟清和肅然禮儀清廟之器服官郎署已有賢聲視學外臺益著風績清明懸鑑士莫遁其秋毫澄汰引繩人爭畏乎夏日迨乎臬藩之闕歷重以歲月之回翔參計親登佐縣官緩急之計延見民吏播朝廷勞來之仁布政不事乎競練居官寧厭其淹久乃以羣恩授具階於戲累日月以叙進所以別沉實守正之人更事任以觀能所以過巧僞奔趨之士尚益敦夫素履終有聞于本朝欽哉

妻林氏加封淑人

制曰詩不云乎琴瑟在御莫不靜好士之靜于官也女之靜于家也相成之德比于賓友所謂

可與晤言者與具官某妻累封恭人某氏淵懿可度柔嘉有章寒燈佐誦讀之勤宿肉供洗腆之養迨夫子既回翔中外而爾益黽勉歲時門屏蕭條服御相安于布素珩珮閒肅儆戒不替于箴圖如美玉之有聲譬雅音之和茲加封爲淑人永綏福履祇服訓辭

祖逢陽贈中大夫浙江布政使司右

叅政

制曰人材之生譬之喬木粵自拱把至于棟梁國旣長養百年而家亦積累再世教本自始報

牧齋集九十八

五

必有初李某乃具官某之祖父舍章挺生孚尹旁達學問淵源乎經術文辭汎濫于百家并日而易衣稱易祿難畜之士夙夜以強學爲經明行修之儒命不永年竟違紆紫之願家宿其業已著殺青之書及爾孫枝遂爲國寶無念爾祖知其大志之所存詒厥孫謀豈獨遺經之有託蓼蕭之澤自葉以流根報祭之心或源而或委是用贈具階官嗚呼齋志入地誠何憾于九京有命自天永有聞于終古

祖母莊氏贈淑人

制曰國家崇獎節義鄉里婦孺咸得表厥宅里
樹之風聲其有沉晦沒身而發聞後世稽諸天
道信而有徵用是闡幽可以爲教某氏乃具官
某之祖母式是嬪則仔肩壺彝當所天之不存
奮身誓死期入地而無憾矢志立孤童稚伶仃
有託孤寄命之節尊章衰老有送往事居之忠
撫厥子以有成暨其孫而始大風霜高秀貞覓
閱結于百年日月光華大節昭回于再世如逝
者之可作信天道之不欺茲特贈爲淑人嗚呼
崇臺綽楔未遑表襮于漆書女師禮宗卒以昭

垂于彤管是可考信于天咫尚亦有助于王章
父芳先贈中憲大夫浙江按察司副
使兼布政使司右叅議加贈中大夫
浙江布政使司右叅政

制曰朕推恩臣下必追命其先人蓋不獨先河
後海禮不忘始而家學淵源名教積習亦有可
以考見者焉贈具官某乃具官某之父德輿云
遠義府孔修起自孤生蔚爲名士睠念手澤少
不忍讀父之遺書佩服箴圖老猶能奉母之餘
教至其誨子以式穀不獨詒後以一經過里門

而下車讓先邑屋入子舍而澣濯禮始庭闈宜爾賢守其家訓沒祀以仁者之粟惟其似之人稱爲通德之門厥有繇矣是用贈具階官於乎克昌厥後既有徵于贊書無忝所生尚謹守其樸學

母蘇氏加贈淑人

制曰朕聞善稟于親行成于內徙鄰斷織著于前聞本立而後道生自家所以刑國累贈恭人某氏乃具官某之母肅祗明惠柔嫺靜頴珥無光輝佐孤生于寢門之內動有箴珮肅婦子于閨闈之間既有嚴而有慈故能食而能教庭戶森列所謂方玉而圓珠仕宦後先蓋亦優龍而劣虎念此珩璜之訓永言風木之悲茲贈爲淑人於乎將慰匪莪之心宜流自葉之澤淑靈不昧尚服享之

牧齋集九十八

七

福建布政使司左叅議徐良彥授朝議大夫

制曰昔我神考遐不作人山陵旣成遺老多在至於外服來朝之使亦有先時侍從之人朕顧瞻在廷言念舊德湛恩盼布靡有遺者具官

制曰士有石隱用晦其身而風徽留炤于後逃
名而名我隨斯之謂乎封其官某乃具官某之
父隱不違親窮思善物讓產而手自致富賑阨
而身甘食貧乃一意于挫名終委心而遯世題
目不愧于高士節槩遂傳於後賢以清白爲箕
裘素風不墜表芬芳于丘壟使骨猶香是用贈
具階官於戲孺子之後長有千秋之名王政所
先尚念季春之聘

母丁氏加贈恭人

制曰君子來朝我有一朝之饗小人有母誰無

牧齋集九十八

九

不置之思贈孺人某氏乃具官某之母慈而能
教儉而好施刑家備雍肅之風娠賢爲清白之
吏迨報政于南國已棄養于北堂載閱三朝乃
膺再命於戲愴鼓鐘于長樂生有同悲佇表刻
于新阡死且不朽茲加贈爲恭人爾其有知尚
克鑒此

廣東布政使司右叅議兼按察司僉

事徐如珂授朝議大夫

制曰我神祖扶養人才詔于孫子凡茲遠方

執王之彥亦有先朝賜環之人簪履之恩聿新

梓漆之材惟舊國有彝典朕何敢私具官徐如
珂經術純明風操廉直當秋曹服官之日正春
宮側席之時慷慨憂危牽連譴謫投荒無地甘
顛顛于滇雲牽復有年乃藩屏于嶺海蓋聖主
無畢世之怒寄雨露于摧殘而勞臣無速化之
思飽風霜于淹久體望滋茂旬宣有聞余方發
號以施恩爾乃有來而至止茲以覃恩授具階
朕今以川東一道畀汝矣治巴渝漢楚之交制
夜郎且蘭之險以爾老于敷歷熟于邊隅故擇
而使之非欲久遺爾于外也念生平歷試之艱
副一時仔肩之託無荒朕命爾往欽哉

牧齋集卷八

十

妻史氏贈恭人

制曰夫婦之際古人比之君臣蓋其艱難怱閔
之閒新故死生之際有可以相喻者乎具官某
妻封安人某氏珩瑤傳家蘋蘩叶禮服組紉而
攻苦操井臼以佐廉迨乎謫籍牽連夫作青衫
之客家門寂寞室餘白首之姑黽勉有加慰勞
無已能使田園有歲時之樂耕鋤相從寢門無
慮歎之聲輕軒特御幸矣賜環之有日惜哉捐
珮之無年長樂初聞嘆君恩之如故短檠未棄

嗟婦命之不猶茲加贈爲恭人服我茂恩視茲
愍冊可以爲之永嘆不徒慰其夫子而已

父思仁先贈承德郎刑部廣東清吏
司署員外郎事主事加贈朝議大夫
廣東布政使司右叅議兼按察司僉
事

制曰士之立節也猶竹箭之有本根也其苞植
者不厚則其捷出者不堅吾有志義之臣必原
本其先世贈具官某乃具官某之父豈弟吉人
博長者孝友著于家門冠衣互易賙救及於
州黨稱責相查行已在儒俠之間居身于通隱
之際置生產于不問日飲無何引分義以自繩
夜行多畏宜爾遺德施于後賢澹寧之訓有光
感槩之風彌長是用贈具階官用以昭明其世
德且可弘獎夫風流

母劉氏贈恭人

制曰士感槩立節未嘗不自念曰小人有母也
節槩之不立而以有母爲解賢母羞之矣朕崇
獎節義深嘆嘉于母之以子節聞者封太安人
某氏乃具官某之母家風肅穆內則整齊事上

著夙夜之勤殉夫有終焉之節及其訓子以有聞迨于謫籍而無悶樹節本先人之教投荒亦聖主之恩能如是乎不愧介山之隱亦已足矣願齊范母之名瞻言簪履于新朝益念栝捲于宿昔茲特贈爲恭人於乎是母是子不虛銀管之書爲孝爲忠允作金彝之輔

山西布政使司提學右叅議兼按察司僉事文翔鳳授朝議大夫

制曰朕惟海內士習不醇文體不正此皆典學之臣徒務潤飾而不以學術表正之故也朕甚

授齋集九十八

十二

憂焉具官文翔鳳風操端嚴學問淵博登高能賦有大夫之才發憤遺經有聖賢之志三爲縣令兩簡留曹皆有賢聲溢于官次乃命爾往督晉學夫晉唐之都也河汾之鄉也以爾有憂深思遠之風故命爾于晉以爾有六經七制之學故命爾以河汾爾受命往矣乃以覃恩授其階於戲以河汾之學教陶唐之人士習之淳文體之正胥自晉始爾之學術其昌明于天下乎爾尚勉之母姑求賢于近世之士而足則于汝嘉

妻武氏加封恭人

制曰讀小戎晨風之什秦之女子何其賢而有文也今其風猶有存乎具官某妻封安人某氏動循珩珮居服箴圖散卷帙于青編矢篇章于彤管惟其體備二南之德無險詖私謁之心故能咏歌四始之風有溫柔敦厚之教蔚矣女士相此聞人茲加封爲恭人詩不云乎厭厭良人秩秩德音爾夫子之德音遠矣爾豈獨爲秦風之女子乎

父在中先封承德郎禮部祠祭清吏

司主事加封朝議大夫山西布政使

牧齋集九十八

十三

司提學右叅議兼按察司僉事

制曰朕橫經訪落紹衣德音蓋將擊道術之屯蒙起百王之遺緒斯文邈矣曠世於茲誰其任之我有遺彥先封具官某乃具官某之父東井挺生西方絕學射劉蕡之策無愧登科負賈誼之才被讒年少是以退而譚道終焉窮而著書斷自洙泗之閒閒取河汾以往窮天人之奧妙覃思有同乎草玄極道理之弘深下帷自比于繁露蓋天之懋遺一老獨抱遺經乃後之必有達人有光家學彼眉山洵軾之繼述止于文章

至石渠歆向之異同未醇學術肆爾傳經之子
爲吾典學之臣是用封具階官於戲尊所聞行
所知道益崇于肯搆本諸師本諸父祭奠重于
先河爾無忘憲老之言余將有臨雍之拜

母趙氏加封恭人

制曰朕聞禮先陰教易重家人凡積慶于高門
必發祥于淑媛封安人某氏乃具官某之母頌
圖叶德珩瑀被躬孝以事其皇姑順以相其夫
子明詩習禮風範聿著于後賢執臬治絲共儉
不殊于宿昔信哉媿德宜爾娠賢茲加封爲恭
人於戲惟茲通德之門代有肅雝之範名儒肖
子蔚爲道德之光婦順母師並著管彤之美

牧齋集九十八

十四

湖廣按察司提學僉事尹嘉賓授奉
政大夫

制曰朕初撫職貢循覽地求丹銀齒革來自荆
州未嘗不念楚才也爲吾典學之臣職思譽髦
宜有以稱朕意具官尹嘉賓器本特達學得精
華遂以文字冠于南服及其飛華中含回翔職
方隨牒平進澹然無求可謂有志矣荆以南闕
視學使者朕遂以命爾爾所部非全楚也然江

漢朝宗於海而衡獨爲宗于岳扶輿鬱積人才
所萃有良史之才有騷人之志而又有魁奇忠
信材德之民生其閒澄汰之以渙其文蘩括之
以底其實實惟爾能乃以覃恩授具階繼自今
楚之杞榦枯柏與芄芄棧樸競進治朝俾余一
人賴楚材之用余汝嘉哉

妻花氏加封宜人

制曰女德不外見附其夫以有聞也鵲巢之詩
以謂邦君積德累行夫人起家而居有之亶其
然乎具官某妻封孺人某氏起自儒素躋于高
華于其夫之績學知其風雨相戒之勤于其夫
之素心知其丹華不御之質從夫以貴莫是爲
宜茲加封爲宜人爾旣若鵲巢之起家矣尚敬
順爾夫子善其所以居之者

父延綬先贈徵仕郎中書舍人加贈
奉政大夫湖廣按察司僉事

制曰士之文章或掩夫先世而風氣必本于前
人夫風氣之所存教不必于式穀和無待于在
陰亦惟其似之而已贈具官某乃具官某之父
居家無子弟之過急難有長者之風居身儒俠

之閒游意市朝之外家無擔石而眉稜之意氣
燁然口有雌黃而胃次之坦夷自若慨有大志
施于後人旋觀沒世之餘是識遺風之自是特
贈具階官於乎生而不偶每羞爲一卷之師死
如有知應快覩萬家之墓尚其幽窆服此殊榮

母俞氏加贈宜人

制曰詩不云乎有母之尸饗詩人之念母勤也
其生而事之也况于死而思之乎朝廷蓋爲人
子卹之贈孺人某氏乃具官某之母相夫以順
愛子知勞操井臼以起家辛勤十指傍丹鉛而
課讀儆戒三餘畫荻有聞樹護永弃茲加贈爲
宜人於戲愴鼓鐘于長樂誰無風樹之思列鼎
釜于下泉益重栝椽之慟惟孝子循陔之慕奉
以終身則慈母斷織之名垂于沒世吁其悲矣
尚克享之

貴州按察司副使繆國維授中憲大

夫

制曰頃者苗民不靖黔路梗塞禽獮之後兵氣
未銷朕未嘗不端居深念秉憲之臣萬里執王
臨軒燕勞如見遠人朕于思命豈有愛焉具官

某才華炳蔚器縕端凝宰劇縣以宜民謝臚仕
而將母爲郎以僞工見績出守以豈弟見思乃
晉臬司往蒞貴竹符傳一下則郵遽風清羽器
四馳而夷獠讐服刀耕火種之俗戶識威名兵
荒燹燬之餘人懷晏息朕旣三年克鬼方之伐
爾乃萬里獻荒服之琛遂以覃恩授具階夫西
南嶮遠俗雜漢楚吏崙用漢法治夷而不用漢
法自治黔所以擾也黔按臣上首功朕心用懽
怛余何忍以武勝黔乎爾能爲我父黔余將顯
陟女

牧齋集九十八

十七

妻蘇氏加贈恭人

制曰士起孤生備嘗荼苦其閨門相貳之勤有
百倍于人者矣國家疏榮必逮其耦不惟因夫
之爵蓋亦寓勞人之報焉具官某妻贈安人某
氏動應衡規躬服儒素壘鹽佐讀機絲無閒寒
窗菽水奉姑洗腆有逾宿肉吁其逝矣傷如之
何感宵旦于雞鳴茫然長夜思語言于龍具策
彼前途睠言勲瘁之艱難益悼死生之契闊茲
加贈爾爲恭人用以著韜佩之誼不徒承禕翟
之光

繼妻徐氏加贈恭人

制曰丈夫有事四方而婦人閒闕從之戒徒叱馭跋涉萬里斯已難矣矧其奄忽道路比于以死勤事者乎予何靳此愍而具官某繼妻封安人某氏出于高門休有華閭組紉謹女功之習錡莒勤婦德之修永襲佐廉風流于山箐溪峒之內徽華永逝覓游于澧蘭沅芷之間嗟玳珮之已捐捲芬芳之如在茲加贈爲恭人靈其不昧佑我勞臣永言彤管之光祔彼黃陵之享

父天秩先贈承德郎工部營繕清吏

敬齋集九十八

十八

司署員外事主事加贈中憲大夫貴

州按察司副使

制曰朕聞至孝之德旁達明神神錫祉厥有靈泉瑞物之出以表殊異如其不然則必在其後人鍾美豐物亦理之恒也贈具官某乃具官某之父生稟粹和死稱醇孝殘肌剖股甘隕身于榻前創巨痛仍遂從父于地下人誰無死天不吾欺以是藐爾之孤蔚爲亢宗之胤蓋誠心感物在異族亦相其哀而和氣致祥至再世遂徵其美願然有子豈曰無年是用贈具階官於

戲旌壽州之門宜揚芬于億載斥鄩人之對無
遺誣于偏辭

母張氏加贈恭人

制曰國家崇獎節孝倣前代烏頭雙闕之制載
在國史至于夫孝妻節駢集一門巧白相望汗
青交映則又昭代所希邁史官所特書也朕嘉
與斯世表之旌表節婦贈安人某氏乃具官某
之母箴圖有聞冰霜爲質夫旣殉父于蚤歲爾
遂自誓于盛年撫弱息于一絲嚴霜夏墜寄孤
生于再世燎火晝寒迨厥子之有聞乃畢志而
長往於戲屈指生存之日皓首何慙下見死孝
之人重泉爲耦茲加贈爲恭人於乎崇臺綽楔
漆書錯互于旌門鸞誥龍章贊冊昭回于表墓
丹心不死如可作于九京黃壤猶生尚爲觀于
百世

牧齋集卷八

十九

山東按察司按察使陶朗先授通議
大夫

制曰我祖宗仍元舊跡轉運遼海舳艫航海
至不吝徹侯之封以勸能者矧今海道久湮軍
需日急我有勞臣拮据于颺風瀚海之中朕何

敢忘具官某良王有聲精金能割飛聲南署著
績東藩迨乎饋運之艱難益厘累年之弊畫蓋
海禁之疏通未久而鯨波之發作無時以鉅萬
之齋糧寄數寸之浮木晝旗宵柝身雜于篙夫
垣戶之閒曉霧暮星心折于島嶼港汊之內用
能使雲帆時轉粳稻不虛兵興以來厥勞懋焉
乃以覃恩授具階頃者河東失守登萊我之門
戶與賊共之爾獨身櫓柱風檣浪檝屹爲長城
何勞苦功高也朕今崑以東海寄爾爾指畫遼
海如視盤鑑豈以畫險而守爲能事乎爾往欽

哉朕且有後命

牧齋集九十八

二十

妻周氏加贈淑人

制曰人主之于勞臣也凡其偃息啓處靡不懷
且念之而况于閨門相貳死生契闊之閒乎累
贈恭人某氏乃具官某之妻圖史被躬珩璜合
則本名卿之家世貴而不驕相君子于糟糠貧
而無怨薜華已萎荆布猶新官舍蕭條尚想齏
鹽之與共波濤衝冒有如風雨之相期茲加贈
爲淑人非徒爲下泉之光亦以紓偕老之嘆

繼妻許氏加封淑人

制曰人臣之義不得顧其私家至于國有大恐而婦人女子能相勉其夫以從王事表婦順可以厲臣節焉朕其寵嘉之累封恭人某氏乃具官某之繼妻函貞德門相夫撫任有鳴鳩一視之德效雞鳴儆戒之風至其服習劬勞稱引大義當道殫相望之日能共飭糜及羽書交至之時願親桴鼓勉巡行于海嶼俾無內憂庀治業于寢門有如軍令豈獨無慙于閩內蓋亦有助于師中茲加封爲淑人爾尚益懋寢興終相夫子膚公之奏爾有勞焉將以傳于女史

收齋集九十八

二十一

祖九詔原任直隸廬州府無爲州巢縣知縣贈通議大夫山東按察司按

察使

制曰君子位不配德仕不竟志則其後必有達人挹彼注茲觀于天道若交手而相付焉原任具官某乃具官某之祖父文成琬琰行合圭璋蜚譽賢科流徽宰邑薄言歸隱何知東帶之慙可以樂饑無復扣門之拙付有餘于造物遺未盡于後人居然五柳之風流千秋如在蔚矣三槐之事業再世有聞是用贈具階官永言世德

之求尚識詒謀之自

父省東先封中憲大夫山東登州府知府加封通議大夫山東按察司按

察使

制曰朕聞濫觴之水足以導積石之源膚寸之雲足以致崇朝之雨今吾疆場言有勞臣邈其家風厥有原本累封具官某乃具官某之父少服庭訓長須異材指廉石以傳家無慙清白抱遺經而俟後有瘁丹鉛急難而非以市名仗義而恥于食報慨有大志施于後賢浩蕩鯨波快

牧齋集九十八

二十二

破浪乘風之願縱橫虎略出揣摩簡練之餘聿觀厥成善繼爾志是用封具階官爾其優游几杖勸勳名用觀收復之膚公尚及來歸而飲

御

四川按察司僉事戴君恩授奉政大

夫

制曰朕以東西多事禍亂頻仍思得文武大略之人以收指麾能事之效乃者蜀僇先至西壘告平戡定有人不忘嘉歎具官某器資恢傑材術疏通奮跡循良著聲郎署屬有西事俾往視

師爾既長才有槃根自試之志而巴又舊治爲
吏民服習之邦奮臂請行出奇獮賊以謂頓兵
孤城之下窮困獸以老師不若收功片楛之中
解重圍以蹙寇往還豺虎之窟而談笑自如指
顧大羊之羣而縱禽在我用能使渝城頓拔叛
人就俘惟爾之勞斯爲稱首乃以覃恩授具階
於戲九絲殘寇尚爾稽誅諸峒狡酋方圖旅拒
解金牛于游刃知有餘能蒐逸獸于三驅俾無
遺種嗣有崇寄佇爾告成欽哉

父有光先贈承德郎刑部雲南清吏

牧齋集九十八

二十三

司主事加贈奉政大夫四川按察司

僉事

制曰夫空谷之絜莫留而其人如玉九臯之鳴
不見而其聲在天此潛德之光也士有抱志于
生前而用譽于身後者何以異此贈具官某乃
具官某之父性資特達造詣溫文才華秀出于
里人德器推重于國子植杖而問喜父母之俱
存負笈而歸躬人子之能事感白華潔白之孝
循彼南陔盡菽水歡養之誠我藐黍稷退而修
長者之行進不求通人之名邈矣鴻冥想羽儀

于當世覽彼鳳德遺苞彩于後賢是用贈具階
官惟茲追命之榮應我闡幽之典尚有考于幽
窈知無愧于明綸

母梁氏加贈宜人

制曰詩不云乎母氏劬勞人子之念母勤也列
鼎而悲望像而拜可以自致而不可以自解我
有愍罔其何敢忘贈安人某氏乃具官某之母
柔順不違肅雍有美澣衣上食事嚴重之尊章
并日視星殫辛勤于家室願然有子身為母師
胡娠賢之有聞而劬躬之不逮中宵宿火音容
恍在于機絲并日加餐口澤尚思乎魚菽吁其
悲矣余有愷焉茲加贈為宜人永貽彤管之名
用慰蓼莪之痛

江西按察司副使曾用升授中憲大

夫

制曰國家承平日久官嘗頽弛司憲度者類皆
低回澁縮上下相蒙朕嗣服以來慨然思革其
故陳時臬司實重其選具官某器業弘深風規
端直掌使節而贈賄風清擢臺端而庾庫弊絕
出按豫部益舉厥職枚荒遠法青州抗章不辟

朱邸古之名御史殆無愧焉屬有監司之推未
究澄清之志栖遲數年賢愚同嘆今命爾以湖
西一道之官有期乃以覃恩授具階夫內外臺
俱冠法冠掌風憲今之薄外臺爲左遷蓋輓近
所謂故事而非 祖宗之制也湖西界嶺轄荆
藪逋叢寇爾不鄙夷其官修舉臬事吾寧久遺
爾于外乎爾往欽哉

妻孫氏加封恭人

制曰四牡之臣有功而見知而猶有將父將母
之懷豈獨王事使然哉亦內無相貳之故也具
官某妻封孺人某氏生于冠族作嬪良士爾夫
乘輅攬轡積有歲年爾能薄寒視衣中宵宿肉
使燕寢有起居之間舉觴無嘆息之聲俾忘內
顧惟爾之勞茲加封爲恭人益勉有終以服無
斁尚亦有裨王事不徒相其夫子而已

牧齋集九十八

二十五

父國福封文林郎雲南道監察御史
加封中憲大夫江西按察司副使

制曰國家之休命及士之抱道縕德而不贏其
躬者非徒報其人也亦以使斯世有觀也封具
官某乃具官某之父多文為富讀書窮老讓田

廬以念寡稚族塋墓以聯宗族一男於爲義不求人知斯可謂潛德弗耀之君子矣清明在躬壽考介福玄衣應杖優游里門人皆曰幸哉有子如此且曰可以觀德也顧不休與茲加封具階官爾之爲德未艾再命以佯亦豈可量哉

母黃氏加贈恭人

制曰樹欲靜而風不停子欲養而親不逮朕顧瞻長樂三復斯言潛然流涕封孺人某氏乃具官某之母婉婉姆教敬共婦德徙鄰斷織成訓子之名坐膝扶床享弄孫之樂節以見姑歿而何憾爾子初免喪來朝而國家方湛恩盼布遂使墳草未宿零露載濃在爾子之孝思可以少慰而朕之悲矧何時而已乎茲加贈爲恭人於戲歿而無知則已苟有知者服茲休命其亦有以監予心于地下矣

整飭徐淮道兵備河南按察司副使

岳駿聲授中憲大夫

制曰朕觀嘗武之詩徐淮之閒先王蓋廩廩焉以南國之不易東隅之有警咽喉之地懼有梗塞監司所在相望而任此者則重矣具官某風

規凝遠器縕純明五載司刑一麾出守乃登憲
職往省徐方振積弱之軍聲卹久窮之民瘼御
援遼之師旅肅若過賓募運海之舟航履如平
地指麾白羽似貞元雄鎮之時談笑黃樓類熙
寧復河之後師薦上達朕心嘆嘉乃以覃恩授
具階朕今改命爾督漕矣唐李泌言東南漕自
淮達汴而徐爲江淮計口我國家兼重徐淮皆
爲餉道計也爾治徐治淮東南要害在爾尺幅
朕倚毗爾者良重爾往欽哉

父九德先贈中憲大夫河南汝寧府

牧齋集九十八

二十七

知府加贈整飭徐淮道兵備河南按
察司副使仍前階

制曰朕聞龍宗有鱗鳳集有翼忠臣義士之後
其流風餘韻僅有存者朕慨然思之矧其賢而
有後者乎累贈具官某乃具官某之父本鄂國
精忠之裔傳金陀文獻之餘矯志博聞家風未
泯好施急難俠骨猶存聿啓多賢紹明先烈是
用贈具階官於戲蓼蕭之流自葉孰非三朝曠
蕩之恩水木之有本原尚念百年忠義之報爾
其不昧尚克承之

母張氏仍前贈

勅曰母之以子聞者亦多矣其有文章節操駢聚一門而競以其母聞者慈庭之教不允懋著乎贈恭人某氏乃具官某之母宿稟閑和教成徽懿左圖右史引詩書爲鑑擊外敏內仁用柔和爲粉澤不煩外傳聿有母師宜爾娠賢蔚然競爽優龍劣虎均爲國之克生翔鳳漸鴻悉分母之遺羽茲仍贈爲恭人用慰累茵之悲式彰斷織之教

陝西布政使司右叅議賈鴻洙授朝

牧齋集卷八

二十八

議大夫

制曰國家郡國藩宣之選多取郎署久次之人乃者兵興不特度支告匱戶部諸曹郎攸助國計茂著成勞屬有甄陞俾當重寄具官某器資肅穆風力堅明當服官民部之時正蒿目軍儲之日飲冰爲國仰屋憂時精勾股於宿逋焚絲成理嚴會計於新餉累黍不遺年勞有聞藩翰攸寄惟長安之重地實畿輔之粵區乃命爾出叅秦中專守關內相視衿要控洪河四塞之雄撫綏士民復陸海八區之舊乃以覃恩授具階

昔者鄭白兩渠衣食京師億萬之口而唐杜佑謂大曆初漑田減於漢三萬八千頃今長安膏壤千里河渭之漕故在爾在戶曹日久向之嗟咨仰屋者可以見諸行事矣尚勉爲我牧秦終佐邦計爾往欽哉

四川按察司副使車朴授中憲大夫

制曰朕慎簡監司精求民瘼目營四海如堂適庭矧蜀方被兵民亦勞止思得公忠體國之士以綏瘡痍在野之人其有甄陞可無書命具官某博通世務誦法古人奮跡賢書歷官郎署當

牧齋集九十八

二十九

職方拮据之日正東隅警急之時指畫車攻幾如親履行陳條上兵事直欲身當虜酋東事解嚴西人未靜命爾于蜀副彼臬司擢居外臺可以竟澄清之志俾治亂國所以仗緩急之才乃以覃恩授具階昔宋命張詠于益固曰孰能處茲文武之間今蜀難甫平逋寇未殄理棼絲之緒而奠礎芥之餘非文武大略未易辨也爾能以益州之治治蜀余不以資格蔽爾爾往欽哉

妻王氏加贈恭人

制曰在昔筐筥興歌濯擬授職閨門之細事婦

孺之微勞莫不播之管弦著在禮典王化滋遠
此風日微得一人焉可以知教朕有愍用何忍
忘之具官某妻贈宜人某氏婦道可宗女圖母
越奉尊章于篤老藥物必躬事夫子于孤貧糟
糠不厭睠惟四德胡不百年斂手足于寒氈永
言荆布聚營鬼于宿草尚想晨昏迨我需恩朕
茲休命茲加贈爲恭人於戲朕欲表著女圖丹
青王化將自爾始惟爾其服享哉

湖廣布政使司右布政使仍管按察
使事熊宇奇授通奉大夫

牧齋集九十八

三十

制曰朕改元卽位諸藩臬之長入見者旣燕勞
而遣之矣其爲吾布德執憲恪守所司者朕亦
有錫予之思焉具官某材劇而用博志脩而行
堅起自刑曹敷歷藩服衡楚羅杞梓之材平播
紀獮禽之績迴翔閩浙載蒞荆襄以文武爲憲
之才兼行省監司之任以六條察吏治而江漢
肅清以十連制所部而溪峒屏息楚用俾乂爾
有勞焉乃以覃恩授具階夫爾之官則蕃宣也
其所司則廉訪也楚稱剽悍急疾先畔而後服
然而蕃以宣之廉以訪之楚其有不乂乎爾有

成勞于此勉終汝猷以副朕命

福建布政使司分守漳南道右叅政

朱綵授中大夫

制曰朕視天下爲一家而閩海東南之戶瘼也
朕宅中御外堂奧晏如而藩服之臣日焦勞于
颶風煙海之間朕何忍一飯置之具官某以子
大夫高等服官春曹冷然水廳之風肅然清廟
之器體望滋茂出叅閩藩遠慮綢繆勞心閱歷
破奸寇之窟穴不廢嘯譚歷島嶼之行迴瞭如
屏幃用使椎卉屏跡海壖真安紓朕南顧爾有

牧齋集九十八

三十一

勞焉茲以覃恩授具階中國久不中倭今雞籠
淡水之間漸見告矣嚮導之不絕汛候之不至
議者多言之而又以謂此非致寇之本原也爾
在閩海良久衣袵之戒豈遂忘于前事乎爾其
懋哉

河南按察司分巡河北道副使吳瑞
徵授中憲大夫

制曰國家畫大河爲南北分置憲臣而河北跨
躡燕涿襟帶京師漳河之閒古稱都會爲吾控
制此土其責至重也具官某德器縝密志操端

明風規足嗣乎先民治行不出于家譜若工奏
績治郡稱平茂著賢聲晉司憲職臨上黨邯鄲
之舊地當兩河京雒之交衝道路犬牙而奸盜
無伏藏之跡徵輸填咽而軍民有居息之安矧
以一路之無虞值東方之有警道里不梗聲援
相資揆之疆事亦有助焉乃以覃恩授具階朕
觀方志漳衛閒土廣俗雜漢興常擇嚴猛之將
治之夫嚴猛非所以致理然欲彈壓重鎮控河
北以衛內地則亦非瓌科異輒之人所能辨也
爾受事未久所部肅然朕知爾勝任久矣爾其

念哉

牧齋集九十八

三十二

時資對之靈事亦百相無以心軍恩對具習矧
以一谷之無憂賦東衣之在警衛里不財養對
無火燄之擬道解惠即而軍民有居息之安朕
對曹與當函代京聯之交衝嚴亂天禾而劫盜
辭致潞辭平茂著賢聲晉司憲職臨上黨邯鄲
明風規足嗣乎先民治行不出于家譜若工奏

牧齋初學集卷第九十九

外制九

河南歸德府知府高鏘授中憲大夫
制曰頃者夷烽日聞道殣未息郡守多傳遽厥
職希望拜除朕深患之思得良二千石表率屬
城意甚亟也具官某學多師古志在濟時奮筆
刑官駁正藩封之典陳情留署力伸將母之懷
久積年資出守劇郡搜剔疾苦勞問吏民手執
丹鉛設教時聞夫絃誦身親畚鍤行河不憚於
追呼至於選將治兵爲未雨綢繆之計屯田峙
糗愧望風奔走之徒四境藉以乂安百城恃以
無恐乃以尊恩授具階睢陽引江負淮南北要
領爾居其閒慨然有屏蔽之思古稱刺史多文
武大略不徒以廉平稱治而已也爾勉之哉

河南河南府知府郭忠宁授中憲大

夫

制曰朕觀於西漢吳公守河南治行爲天下第
一而史不載其名意欣然慕之以爲安得此良
吏悃悃無華者以稱吾德意乎具官某風規凝
遠器局揆明初在西曹平反茂著比遷水部歲

閱滋深乃命專城出守雒邑庀國事如家事嘗
夙駕而問耕以察吏爲安民每晨興而視牘所
司以狀來聞曰實政實心宜民足國所稱治行
第一爾庶幾焉乃以覃恩授具階河南故稱土
中乃作雒保釐周家盛時何廩廩也今東方徵
兵未已蒿少號雒之閒戈爰相逮皆爾所部也
詩不云乎召伯勞之爾無以漢吏自滿予將祇
命爾以召伯之事欽哉

福建泉州府知府趙士許授中憲大夫

牧齋集九十九

制曰泉之爲郡眇然在嶺海之表冠蓋相望奸
利滋多蓋有中土壯郡所不及者安得良二千
石與我爲理朕蓋深念之具官某民譽清華家
風綿邈廷評水部蔚有賢聲劒浦泉山所至治
理謝貴游之竿牘霜凜雉門破奸軌之根株風
清虎穴乃可惠我單赤因而聯以師儒四民歌
清德之詩千載繼前賢之迹乃以歲閱授具階
泉之治莫盛於宋蔡之理行王與真之教化何
異車而合轍也爾爲郡一出於仁人學士之爲
而絕去鄙儒俗吏之習其亦有前政之思乎朕

之嘉爾不徒以治一郡而已也欽哉

直隸河閒府通判劉濡恩授承德郎
勅曰乃者狡夷作難東方失守勞人志士奮身
下僚願爲國家冒危難効死力者斯國之寶臣
也朕深念焉具官某起自明經擢爲佐郡雖在
佐貳蔚有體望屬有東國之使三韓道梗使車
縮朒爾乃橫身奮袂慨然從行不卑小官不避
艱險颶風鯨波之發作簸頓良苦島夷賊艇之
窺伺出沒無時斯可以愧臣子之當事而避難
失事而逃死者矣爾往在河閒年勞懋著乃以
覃恩授具階於乎仗復國之寵靈銜天子之威
命率彼師徒搗其窟穴此勞人報國之秋而志
士立功之會也以爾才略勉思建豎無使泛舟
之師終爲遷延之役爾往欽哉

父必紹原任真定府同知加四品服
色致仕加贈奉政大夫

制曰國家簡用賢能崇獎吏治蓋有淹滯下僚
抑沒功令而當宁爲之動色沒世猶以發聞予
有褒冊必先及之以有報也亦有勸也原任具
官某乃具官某之父孝友服先民之訓言行以

古人爲師出牧竝邊入佐畿輔敷歷滋久廉辨
有聞稟執筆於平反甘曳裾而終老懸車致仕
雖未及大夫之年脫屣去官至首勤明主之問
終能穀子教以事君留未盡之忠於後人試已
效之譜於今日服師儒之教能以賢而得民勤
輦鼓之思願移忠而報國觀箕裘之滋茂知風
骨之猶新是用加贈具階嗚呼天不吾欺庶可
觀忠赤之報人誰無死尚勉遺汗青之名

山西大同府東路同知劉士璉授奉

政大夫

牧齋集九十九

四

制曰雲中爲幽并重鎮控制虜衝以寇至之無
時軍儲之時詘錯置郡丞分理餉務儲備出納
鈐轄邊防任茲選者難其人矣具官某再更劇
邑蔚有能聲遂以長才試於邊郡操甘飲水才
捷轉丸伍無戾癸之呼儲有崇墉之積用能飽
吾戰士壯此軍聲乃以覃恩授具階乃者素酋
稱雄游牧多警邊吏又往往因仍耗蠹不惜士
卒夫武夫枕戈坐甲不得宿飽而文吏乃以升
斗龠合坐而扼將士之死命斯已儻矣朕將以
儲政寄軍政用軍興之法以弊文吏爾勉之哉

朕則顯陟汝

父輔平封文林郎山西平陽府解州
聞喜縣知縣贈奉政大夫山西大同

府同知

制曰三秦土厚水深奇偉之士嶄然輩出卽終
老儒服而行義炳如聲施於後朕固將表而出
之矧其有子封具官某乃具官某之父生稟瓌
姿慨有大志下帷攻苦奮玉杯繁露之文矢志
博綜通禮樂兵農之學有奇不偶爲善於家薰
德善良秉仁心而御物傾身然諾蘊義氣以生
風肆爾遺經傳於賢子丹鉛猶在奉手澤於簡
編白賁可貞儼心師於函丈是用贈具階官尚
有聞壹行之傳不獨享書命之榮

牧齋集卷十九

五

四川順慶府通判張一鴻授承德郎
勅曰巴郡遠在西南征繕之後民亦勞止重以
徵材於蜀披林薙菁以勤吾人朕不忘遠民其
忍忘遠吏哉具官某起於鄉舉分俸專城幹濟
多方清勤一節勞問疾苦閱歷於金泉渠篆之
閒省視農桑勸勉以父子家人之事野聽實人
之頌山無木客之吟顧此遐方聿有能吏乃以

覃恩授具階爾不觀夫木乎浮江達淮傳致萬里一旦斲爲棟梁登於明堂法宮之上爾遠吏治行高等不泱月而達於朕聽猶是木也爾茂勉之朕之材爾不小矣

江西廣信府通判吳士熙授承德郎勅曰國家設官半判上佐得與二千石叅校政事短長利病信州據吳楚閩粵之交爲東南望鎮有能舉綱引墨飭贊郡符亦吾之所急也具官某騰譽徵書起家循吏初尹南靜繼宰新寧皆曰周才躋於別駕事繁必理刃皆有餘庭無

牧齋集卷九

六

呼晷之民野絕探丸之盜屬城咸率程書有聞乃以考績授具階昔有宋青溪盜發比疆連壤衆如充耳王愈在信謂賊不百里俯吾境設防禽獮東南又安信地僻山深盜賊淵藪遼左兵興漸次騷動萬一有事爾能爲吾之王愈乎勉思率勵副我甄昇欽哉

浙江台州府通判趙應旗授承德

郎

制曰悃悞無華之吏隨牒平進所至而治有績可書古所稱詳明政術可以理人者蓋庶幾焉

具官某初試宰邑綽有賢聲屢冠程書遂遷倅郡江山瀟灑既清爭以宜民政理廉平亦勤勞而問俗乃以覃恩授具階台之爲郡在前宋稱壤僻民愿牒訴簡少而後乃以繁敝著也今何如哉爾爲政日久問俗以知台因台以知天下不獨倅一郡而已也朕則顯陟汝

江西南康府推官李應昇授文林郎勅曰郡國之有理官所以矜庶獄重民命也頃者吏不率職希望拜除有能壹意祥刑稱國家所以設理之意朕將不次擢之具官李應昇少

牧齋集卷九

七

擅文名長爲民譽如衝牙之玉動而有聲佐憲以來蔚有令聞以清明穎異之才而有直溫簡廉之德平亭疑獄爲之清夜而思聚教罷民至欲下車而泣能使人懷愷弟吏襲清寒庭無呼晷之聲野屏椎埋之跡所司上爾治狀久矣乃以覃恩授具階書不云乎欽哉欽哉惟刑之靜哉今刑官之不職不靜之故也若爾者可謂能靜矣靜於刑則理靜於位則共不獨理一郡而已也欽哉

河南開封府推官范復粹授文林郎

勅曰郡國置司理之官專以祥刑爲事刑一成而不變君子所盡心焉者也舍祥刑之職弗修而游意於法之外豈吾所以任理官之意乎具官某抱蘊冲和懷才侗儻稚負先憂之志仕爲淑問之官嗟教導之未純時見罷民而啜泣顧重輕而宜允每臨臬石而咨嗟蓋爾旣精於爰書而又傳以經術遂使右武習豪之俗幾無攘獄過訟之人汝能俾獄無留余欲厝刑不用副我欽恤良用歎嘉乃以覃恩授具階嗚呼國家妙選理官登之臺諫理官刑人以理言官刑人以言皆丹書也理於刑則祥理於言則昌爾其務竟爾理朕且有後命焉欽哉

浙江嘉興府推官姚鈿授文林郎

勅曰郡國置司理之官所以佐察六條而觀中五刑也嘉興爲東南要區奸利交跡非肅明強幹之士克勝其任胡以中於程書具官某介珪不琢精金有聲擢對大廷讞刑劇郡以明允愷弟之德兼綜釐擊斷之才公以生明肅吏鑑昭於水鏡廉而不劌亭刑科中於玉條茲以覃恩授具階夫三尺律人主所與治天下也今要辭

日煩獄麗罔察猥以世輕世重爲解朕深患之
爾爲理明於五刑式繇敬爾獄以長我王國豈
異人任乎爾其懋哉

廣西南寧府橫州知州趙廷忠授奉

直大夫

制曰頃者邊隅繹騷吏治頽弛朕大弊羣吏周
視遐方蓋將遺汰瑣科名法之人簡用文武大
略之士需材方亟書伐宜先具官某發跡賢書
出宰百里爰稽勞績晉典雄州久著吏能兼閑
將略峒夷溪蛋首服於屏幃之前盜海剽山晏

牧齋集卷九

九

息於指顧之下黃洞投款三江之土宇來歸烏
嶽革心百雉之城墉屹立頃因有事移爾近畿
須爾臂指之能爲吾肩背之捍服茲新命念彼
舊勞乃以覃恩授具階於乎治近何異於治遠
有初必克於有終益勉告成以須不次欽哉

陝西興安州知州馮珣授奉直大夫

制曰朕卽位以來留心弊吏如古所謂奉詳明
政術可以理人之詔者未嘗不嘉予之具官某
爰以明經試於吏治三更壯縣晉典方州以學
優則仕之能當三年有成之後操刃能割會不

患乎尫茸比屋可封又何憂乎獷悍衿要之防
彌固襦袴之澤有聞乃以考績授具階乃者蜀
寇告警褒斜棧道閒流離接踵爾在金州故稱
良牧撫綏彈壓方略可觀古稱刺史有文武大
略不徒以治辦爲能事也爾其勉哉朕將顯陟
汝

山西平陽府吉州知州魏可教授奉

直大夫

制曰朕留心弊吏方州之長奉可以理人之詔
咸與勞問至於控制衿要號爲雄繁治理茂著

牧齋集九十九

十

尤深歎嘉其官某博喻爲師經術飾治拊循疾
苦字憂深思遠之民休養敦龐還土厚水深之
俗四境咸理三年有成乃以考績授具階志稱
此地西臨黃河控引龍門壺口之險雖少屬邑
實爲雄州爾牧其閒循覽襟帶其亦有要害之
思乎天下有事文武大略未可謂不在儒者也
爾其懋哉

四川保寧府巴州知州賀納賢授奉

直大夫

制曰巴於劔外號爲雄州古之名牧有惠洽閒

巷名以子孫者今吾理人之吏追古風績膏雨
吾土吾何愛璽書不以風異之具官某筮仕壯
邑晉踐方州吏不能欺可謂向風而治民亦勞
止庶幾計日而安惟爾年勞登於師薦乃以覃
恩授具階頃者蠻洞不賓蜀漢道梗爾所牧地
猶未被兵益勉吏治兼討軍實相視衿要礙戎
屏華夫時平則嬉寇至則戒此俗吏之爲而非
朕所望於爾也爾其念哉

原任四川成都府崇慶州知州楊伯

高授奉政大夫

牧齋集卷十九

十一

制曰朕初卽位盼布湛恩覃及中外至先朝循
良吏政聲流傳而陟明未逮者所司以聞咸得
給補如例具官某奮跡賢書典州劇地問民勞
苦蒞事廉平天清水以爲心在焚絲而必理中
於賞率積有歲年迨乎免喪以來朝乃得循資
而上請蕭然襟被猶餘琴鶴之高寒蔚有薦章
尚載袴襦之歌頌撫爾舊政需我新恩用如所
請以覃恩授具階惟爾之先聿有遺直家風弘
長及其後昆朕之需恩於爾用疇爾牧養之勞
國有彝典抑亦使天下知忠臣義士尚有餘慶

而以砥節首公相勸勉也爾其懋哉

父曰孝贈奉政大夫四川成都府崇慶州知州

制曰古者崇獎節孝宣延風美是以杞雖小國亦吊城隅之哀而周之中興厥顯夷宮之命今吾節義萃於一門不有封崇何言激勸旌表孝子某乃具官某之父起自狐生茂著名行夙夜休厲奉母氏寢門之規晨昏膳羞顧孝子循陔之養歡愉菽水羹何必於嘗君眷戀雞豚痛有同於益母是以烏巢鯉集雖異類亦相其誠而表墓旌門在宗黨咸歸其孝無愧荀何之號居然曾閔之風矧有遺休延於再世是用特贈具階官於乎圖禮宗之像錫以胙膳勒孝門之銘合於上下是母是子咸有聞也以觀以感不亦休乎

牧齋集卷十九

十二

山東濟南府德州知州謝錫教授奉政大夫

制曰國家轉漕仰給東南而德州實爲綰轂衛漳諸水合流城下水陸浩穰介在孔道爲我守茲土者亦甚劇且勞矣具官某文學有聞束修

自好休有譽處山典方州蓄稷頻仍冠蓋相望
征繕四出而官無鑿鼓之鳴廚傳飭修而民無
繭絲之擾乃以覃恩授具階乃者東隅亦多事
矣德當五方之交亦四戰之地援兵繹騷盜賊
生發保障折衝兩者交重夫所謂刺史有文武
大略者在撫字其人而善用之未可謂儒者何
以在朝歌也爾其念哉朕將顯陟汝

直隸河間府景州知州宗萬化授奉
直大夫

制曰吾三輔之地景爲畿南之首而介於冀兗

牧齋集九十九

十三

之間頃者盜賊生發探丸推理者交跡國門思
得健吏以鈐轄之疆場之地一彼一此吾何患
焉具官某志存休息政在撫循當冠蓋之相仍
兼歲時之不易而能使過賓如歸暴客遠屏六
條成事帥薦上聞乃以覃恩授具階夫古穆今
景方執橫騫亦四戰之地也晉人謂三方有事
幽薊無兵使梁得穆必西侵深冀其患益深今
東方不靖畿輔戒嚴景實幽薊之外屏也尚其
悉意保障屹爲重鎮朕將有宗寄焉爾勉之哉

牧齋初學集卷第九十九

